

四庫全書

集部

欽定四庫全書

集部

儼山續集卷五

六

詳校官庶吉士_臣李如筠

中書_臣劉源溥覆勘

總校官中允銜_臣王燕緒

校對官助教_臣汪錫魁

謄錄監生_臣李 崑

欽定四庫全書

儼山續集卷五

明 陸深 撰

七言律詩

五十
三首

遊儲芋西園池乘月夜汎

峯巒巖壑俯中流
何處三山與十洲
新雨不妨泥滑滑
好風先送水悠悠
鷗無機事迎人下
客有高懷盡日留
向晚星河迷上下
笙歌燈火木蘭舟

縣衙隨班

幄殿高懸絳節朝龍紋浮動瑞烟飄地當東海開黃道
仗倚中天切紫霄花縣千城臨禹貢華封萬口祝唐堯
年時正憶臚傳裏玉筍金鋪具百僚

歲暮風雨中發藏書示楫子

歲寒風雨合江樓燈火樓頭數夕留新命誤蒙吾已老
舊書多在子須收星辰萬里趣關塞環珮三朝侍冕旒
抱得寸心終許國未應猿鶴怨林邱

三日雨後登儼然亭

蕭蕭竹樹夾溪深，一雨初晴長綠陰。
真意倘違空老大，野芳雖少亦山林。
好風似舊穿高榻，流水如知繞素琴。
東去大江知到海，為誰烟浪送歸心。

寄黃希武提學

憶昔長安夾道居，玉堂黃閣晚來初。
槐陰滿院或共賦，藜火隔窗時校書。
歲月悠悠成浪迹，烟波渺渺正愁予。
聞君咫尺騎驄馬，病卧扁舟限所如。

夏日樓居

小樓長日轉朱炎
糴裊殘書手自籤
性癖真成文字蠹
官清擬辦水晶鹽
白雲出岫來當戶
綠樹搖風送入簾
却喜到門塵事少
始知吏隱信能兼

火花次楊東濱韻

巧憑銖兩結根芽
暗裏機關頃刻花
風火陣中疑帶雨
樓臺影裏半為霞
催開始信由人力
搖落寧須待歲華
大菊瓶梨俱爛熳
好開懷處是還家

南溪

四面谿山如畫裏扁舟南下更悠哉薰風五月常先到
梅花一枝偏早開茅作小齋俱背水月臨午夜獨登臺
朝宗萬派俱通海遙向鄱陽一脉來

九日山居客至以大風不遂登高因次李空同
集韻

澤國風濤鬱未開長緣病骨懶登臺無期遠客還能至
有幾重陽得再來黃菊自應籬下看清霜如為鏡中催

當年空負凌雲氣，獨把茱萸首重回。

春日齋居對雪

盡日風雲掃不開，雪花如剪下高臺。
幾家菜麥春猶淺，何處漁樵晚正來。
去路欲迷南過鴈，餘寒尚阻北枝梅。
病來辭賦渾忘却，慚愧梁園授簡才。

病中簷外石榴花盛開

病卧高樓傷客心，隔簾花發晝陰陰。
朱房宿露輝朝日，碧葉穿雲映遠岑。
大椀移栽今滿地，茂陵回首欲霑襟。

一枝為挿如年少愁鬢天涯不上簪

雨中宴莊氏東園留題山亭

洞中山石俯波光意外林花薦野芳況有管絃相映發
儘教風雨佐清狂虛疑四老烟霞地正是三江雲水鄉
我欲卜鄰酬望想自應團社寄篇章

二日過唐橋莊

畫船如鷁水雲遙閒過南溪五里橋行人渡口出復沒
急鳥沙頭鳴更搖相携看菊留茅舍獨往尋源隨海潮

無限高情付江路林梢落日見漁樵

秋懷

斜風細雨滿蕉窗蘆花蘋花繞大江潮上水痕魚六六
秋隨天遠鴈雙雙破除俗累還高卧韜卷談鋒願豎降
物色若教供指點青山合比鹿門龐

甲申元旦待漏入縣齋隨班

樓閣參差一水西攬衣猶自候朝雞葭灰已應三陽轉
帝座遙瞻北斗低步入花封和雪動聲傳嵩祝倚雲齊

太平有象若王聖天保詩篇手自題

春晴登樓

新晴樓館拂雲開萬瓦含風接上台
短晷漸隨陽漏長
長江元傍海開來雲山疊疊春千里
世事悠悠日幾回
倚遍闌干思無限黃金誰築最高臺

鳳岡書屋為寧波朱允升賦

鳳凰岡下結幽居能讀先人萬卷書
手種碧梧深雨露
誰題凡鳥到門閣楚狂空有歌相和
阿閣曾傳事已虛

見說上林工奏賦白頭未必老相如

六日始晴

春日常陰到人日今年人日隔宵晴
雍熙有象回天地鼓吹無能答聖明
江上舊便高枕卧花間新辦小車行
東風又動吳波綠流過閒居獨有情

有拳石類靈壁嵌竅可愛作盆池貯之庭中

湖上青山得共分映空搖漾綠生文
下蟠或有蛟龍窟高踞疑空虎豹羣
雨後愛看封碧蘚月明如見吐游雲

九華雪浪留題品願附蒼蠅次第聞

送何鴈峯郡伯入覲

六龍天上中興年五馬雲間早著鞭
臺閣九霄圖畫裏衣冠萬國冕旒前
淮南卧治須台鼎宣室論才促御筵
試向王正占緯候風雲日月滿堯天

登南廣福鐘樓

百尺闌干圍暮鐘江流曲曲卧真龍
望窮南畝棲禾黍天放西風吹菊松
落日樓臺俱渺渺浮雲舟楫自重重

凌空為盡悲秋興一上高樓興轉濃

晦日出城送葵曹啓東憲副

入雲城堞俯危闌石磴沙隄路幾盤
滿目山光無近遠一番人事有悲歡
聊生政可三杯酒進步何須百尺竿
細柳幽花倍惆悵東風漠漠釀春寒

秋日無聊偶然作

問余何事每悽然尺壁光陰閱歲年
舊讀書今存蠹穴新縫貂已刺鶉懸
常餘孤枕還鄉夢頻乞東家買藥錢

自信英雄須到骨業身隨處了塵緣

贈別尤宗陽還吳門

臨岐莫恠恨喑喑投贈天涯紙半函澤國鄉音三泖北
江湖夜雨一燈南浮蹤去住僧留偈世味寒溫佛飽參
歸去若逢人問訊文章何用學春蠶

懷都下友人

梅蒸懸榻畫慵開徙倚階除破碧苔短夢空隨蝴蝶化
尺書頻問鯉魚來迷人芳草偏留雨極目浮雲忽送雷

千里相思多少恨驅除無計且銜杯

喬白巖太宰家山留題在邇亭

晉陽文物上卿家小作江山殿歲華望到白巖明玉雪

相去十餘里

由來綠野鎖烟霞雲牕覆奕傳仙譜石室藏書

帶相麻同是登臨還在邇遠尋何用訪丹砂

廿四日曉發平樂白巖追送山行數十里中途

微雨有贈

山中秋色半陰晴上相肩輿許並行別有歲年悲短髮

與白巖別廿三年矣調
子如昨但髯髮有白者

老無文墨愧諸生細談舊事魚

新事遙聽松聲共水聲珍重桑榆最名勝龍光咫尺是

神京

書院池亭忽有玄鶴下集因養于庭

橫空一鶴下危闌隱隱丹砂變羽翰疑是歸鴻須繫帛

莫將野鳥誤稱鸞青田到後雲天遠北海從來歲月寬

白鶴千年
復化玄

飲啄漸馴宜試舞客衣偏感化長安

東阿道中對雪

天為山行借雪看路隨天遠更漫漫詩成驢背偏如意
病後狐裘少耐寒授簡有才懷帝子折梅無使寄長安
惟餘一片郊原興白馬翩翩兔窟乾

和陳中川秋燕東關寺

太原城畔東關寺合讓元龍獨倚樓回首風烟成隔歲
當時遊賞正高秋黃花破帽寒猶戀紫塞浮雲晚更稠
今夜燈前聞古調三巴最苦若為酬

發平潭

流年如水客程遙，又是王正第二朝。
關塞極天三晉國，風烟入望五雲霄。
名山有副藏遷史，擊壤無功頌帝堯。
千里不妨隨騷裒，一枝終自負鷦鷯。

送胡汝載丞武昌

詩律從來徹骨清，哦松端不負茲行。
星辰南斗占郎位，江漢西來抱縣城。
鸚鵡洲邊芳草合，鳳凰臺上遠山晴。
春明門外衝寒別，欲折梅花重有情。

蕭海釣文明先生挽詩

金史卷之八十二
卷五
朝野名傳翰墨餘白頭空有讀殘書南荒秋早逢搖落
四海人多問起居塞下當年曾失馬釣絲終歲竟忘魚
八哀此日還成賦慚愧先生識面疎

連日遲李獻吉不至有作

幾日都門長者車風塵不見正愁予只今對面還千里
何處相思有尺書秋色天涯催客暮山光樓外為誰舒
空歌杖屨回長嘯終愧緇衣歎索居

西堂分韻得新字

帝里風光屬小春
橋門高燕集嘉賓
城臨北斗看山近
人愛斜陽送酒頻
憶昔圖南同作客
相逢回首各傷神
情深渾欲忘歸去
怕見樓頭月色新

安鴻漸贈詩魚惠紅酒狐裘途中和答

恭承帝遣出詞林
珍重高懷抵萬金
醇酒已從心醉後
綈袍何止故情深
秦關日月時分照
遼海風雲忽送陰
一路畫圖隨馬首
據鞍聊得繼高吟

寄曹孚若

憐予獨住神仙府憶爾清齋御史臺月近上元如有喜
賦成郊祀愧無才香飄御輦和雲度寒勒宮花待日開
已覺歡聲連萬國更瞻佳氣滿三台

送何文徵赴開州

江東文藻竟誰如新綰銅章左佩魚天上風雲元咫尺
兵前草木正蕭疎烟樓夜遠三刀夢露冕春行五馬車
便欲修成循吏傳即看名滿薦賢書

番陽察院課種竹

偶來種竹當公事
此去成林知好看
春雨龍孫過牆起
月明鳳羽滿谿寒
恍疑臺殿臨淇水
旋着闌干護石壇
欲報所思頻悵望
自將顏色比琅玕

宿常山集真觀

病懷自愛尋山憇
面面芙蓉映遠峯
向晚樓臺樓宿霧
報晴鐘鼓動秋風
千重地脉閩關北
八月星槎浙水東
懷國望鄉俱不極
一龕燈火翠微中

途中見縣僚迎春

綵幡銀勝颭微風塵影人聲蹴踏中殘歲雪消江柳外
一年春到海雲東文明有象占天運草野無才贊化工
須信烟波通雨露輕陰催煖護真龍

遊武夷

清遊妙得此山中一度來過一不同泉石烟霞時上下
陰陽昏曉自西東溪流九曲層層去雲鎖千峯面面通
向晚天風墮仙樂月明知是武夷宮

秋曉汎九曲

縹緲烟霞曙色分
蓬壺玄圃只徒聞
丹崖倒射潭心影
錦浪初生水底紋
合有仙靈藏蛻骨
寧無富貴等浮雲
擢歌九曲應誰和
獨倚秋風弔二君

遊歸宗巖

異境靈源閔復開
直從一水接三台
閩山形槩何如此
朋輩登臨有幾回
片石隕空風出洞
孤松架壑晝聞雷
白雲已滿層臺下
雲裏更尋高處臺

次韻答萬石梁大參

得陪騶從出城遊
况愛烟嵐向晚收
楊子何心能頌莽
仲宣無計且依劉
林間鳥並鵲聲急
雲裏江分燕尾流
酒量近來因病減
令人苦憶醉鄉侯

長至班罷

歲晚滄江客未還
履長冠冕尚隨班
五更漏水浮銀箭
千里藩封傍雪山
舊典歲修知國體
孤臣身遠憶天顏
新陽一脉須調護
環珮歸來學閉關

出北郊候客因入金繩寺獨坐

初過城陰駟馬橋
緣溪水竹正蕭蕭
得閑豈恨流年晚
愛客渾忘去路遙
風捲旆旌驅陸海
天寒樓閣霽烟霄
南中景物長妍麗
囊底無勞歎皂貂

病後閉關

萬里橋邊萬里身
西風撼撼鬢毛新
天應憐我長為客
事到求名始累人
滿院蒼苔行省宅
一川黃葉大江濱
少陵老去多秋興
且傍雲山結四鄰

次韻耐齋涇川

蕙葭真倚玉為林虛負知音愧此心世路百年風浪迴
天涯雙鬢雪霜深依依別思俱通夢藹藹春雲欲化霖
拋却簿書山水裏停驂時得和齊吟

遊烏尤寺

插天一柱障東南高下僧房共佛龕巫峽地靈勞鎖鑰
峨眉天險隔烟嵐常驚虎豹蹲蒼莽疑有蛟龍起碧潭
為問魚蟲箋爾雅景純曾此事幽探

閬門登城晚眺

雉堞雲平臨北斗橋門流水接西湖綢繆巷落紫鐙火
輪轉東南鎖舳艫西子館前多半夏越王臺下有靡蕪
晚烟生暈溪風靜欄檻千家入畫圖

京師寄姚玉厓

十度書來九不酬遙傳賓館是蘇州文章合動羣公賞
山水真當萬戶侯未見故知能薦馬但聞東道暫依劉
相思又上金臺路滿地西風吹暮愁

寄汪思雲

白玉堂深午漏遲
黃山高處倍相思
人於鶴背腰纏貫
心似蛛絲手論棋
聽雨樓頭眠較穩
望雲天際立多時
十年萬里常為別
獨對金臺一賦詩

壽汪思雲六十

黃山六六歲華新
綺席宏開送入珍
手揮千金作義事
眼見四朝臨聖人
尋盟愛結煙霞侶
耽奕偏宜竹樹鄰
天上長生先註錄
共君華髮守松筠

壽汪思雲室余孺人七十

越山高處入青雲仙里華堂啓壽尊日映萱庭花晚翠
風含椿樹露朝新筵開綠醑重茵席簾鎖斑衣五色文
從此耄齡垂慶節會看花誥玉樓春

嚴山續集卷五

欽定四庫全書

儼山續集卷六

明 陸深 撰

七言律詩

三十
一首

送皇甫子循謫黃州推官

雪堂舊路君重到赤壁文章五百年
一向東曹分郡檄却從南斗望台
驪流塵遠道征袍上宿雨清秋客
鬚前明發大江過夏口中流應有濟
川船

華侍讀鴻山以紅氍紵靴相贈奉謝

紫氍絲履慰新寒
扈從秋陵路幾盤
飛舄空傳雲外到
舞裯不數掌中看
著來紅軟身先健
卧對青山夢亦安
情似綈袍人似玉
滿懷瓊玖報應難

劉都閫以紅花本見貽

才賞名花當送春
移根西向伴吟身
為誰池館能憐舊
到手風光又斬新
謝令空題紅芍藥
杜陵偏感白頭人
公庭事簡餘芳草
留取青枝襯綠茵

秋初望西山有霧氣如雪偶成

日照西巖曉霧封恍然遙對雪山峯
奔波十載有萬里雲水半生知幾重
天上樓臺新雨候長安風物早秋容
長趨館閣慚無補日近烟霄五色龍

送劉甥兆元會試

天南春色探支來遠送魁春折早梅
江上形容吾老矣望中臺閣子行哉
科名莫以文章小甲第須掄將相才
記得當年塗抹處黃金城闕杏花開

自睢陽入梁有懷何鴈峯憲副

雲間遂作三秋別，濠上相為一宿淹。
人世百年悲喜共，客程千里雨晴兼。
魚棠陰鶴乳思方去，玉節金符令更嚴。
後夜梁園回首望，鼓城山月水晶簾。

送王禮侍思獻冊封

八座清嚴玉署寒，新持龍節下雲端。
分封典禮存周制，奉使威儀覩漢官。
南斗文星占氣象，北堂萱草慰平安。
還朝正築沙堤路，看草黃麻墨未乾。

次韻徐登州留別

相看把袂又微曛
春燕秋鴻各戀羣
江上不題鸚鵡賦
潮州應少鱷魚文
先皇賜第恩如海
五袴歌聲響入雲
一枉朱轡更東去
行春空谷馬蹄聞

送劉德徵赴夔州

昔從夔府望京華
今去江南萬里賒
亦有詩篇如杜甫
莫因辭賦弔長沙
人從五馬憐春色
地接三巴切暮笳
天子正思甦遠郡
長城時見倚雲斜

利路紀雨八首

自廣元至栢林驛適久旱得雨口占識喜

甘棠實恐負初心時雨何期更作霖行處萬山驚薄暮
望中一片見濃陰飛揚豈為催詩急飄灑終憐潤物深
安有隨車方往轍虛煩父老沸佳音

抵保寧是夜雷雨大作明復晴霽出謁文廟遂
由城北門過社稷壇轉入西門禮城隍神拜張
桓侯墓復出南門觀浮橋廢置乃自東門還分

司疊韻

慰却三農渴望心
通宵霑潤已成霖
客盤烏道清新暑
雲護龍湫散遠陰
暘雨極知天意厚
節調空感國恩深
蜀川花鳥今無數
隔葉鳴鳩多好音

自大寧至瀘溪館小憩復有雨意遂再疊韻
瀘溪已入順慶之境以未忘閔雨故附之利路
云

兼程計日竟何心
聊慰蒼生久望霖
疊疊溪山千里道

蕭蕭竹樹萬家陰
閒看行蟻占遲蚤
試策新秧問淺深
五月南來多淑氣
併將風雨佐虞音

自射洪適梓州雨候同栢林驛三疊

人心盡處合天心
消得巴渝三日霖
自信本來調水旱
却緣底事怨晴陰
雲封蜀道千山重
江到瞿塘萬里深

舊是吾家歌吹海

放翁帥蜀有十年歌吹海之詩

買教絃管續餘音

午後微雨明早發
中江新漲壞橋拿
舟而渡始知四郊
得雨甚渥四疊

泉聲曲曲度江心知是前山已化霖
巫峽風烟天漠漠巴渝歌舞曉陰陰
春回穠極連村合涼沁芭蕉到骨深
聖主中興多法古宣王雲漢有遺音

予卜以六月十一日履任六日到省中諸公憂
旱甚勤九日晨入撫院遇雨未愜十日雨如傾
注未已喜而五疊

飄蕭竹樹動鄉心却是西川雨釀霖
水繞巴江流漸長雲來巫峽氣常陰
不妨栢溜參天下復愛棠樓隱地深

欲為吾民歌帝力陽春白雪有餘音

十日晚同朱秋崖憲副鄭海灣少參同齋夜分
禮成星月朗然厥明有事公堂小宴時得雨六

疊

好雨知時慰客心須將滴滴比甘霖紫薇花下涼先動
翠栢叢中曉更陰賦就漫誇神女麗夢回已感聖君深
遙憐谷口躬耕處試聽康衢擊壤音

十二日復得雨大足七疊

浪博虛名愧此心真成三日雨為霖谿聲一夜喧新漲
雲氣千峯結晚陰喜極翻嫌歌管脆病餘渾怯酒杯深
窓前最愛芭蕉響疑有人傳太古音

送徐伯臣出令奉化

徐卿家世更能文新綰銀章下五雲龍種擬看空冀北
牛刀聊復試雞羣氣橫湖海神仙侶坐擁江山錦繡紋
欲向風霜占大節却從冰蘖樹奇勲

送王世美赴承天寫碑

江漢星分本上游中天一統帝王州時瞻王氣蟠龍虎
實有文光貫斗牛詞客曉從三殿下筆端人擬五雲留
丹青琬琰俱能事延攬登臨總勝遊

十一月二十日次太平驛見梅花和謝僉憲邦

正壁間韻

山雲黯黯復冥冥釀雪為霖總未成忽見梅花如着意
即看詩草可憐生月來粉蝶渾無影風度黃昏似有聲
況與歲寒期更早玉人消息最分明

次韻荅介谿

志榮遇之感

風雲常護六龍行，慚愧恩題翰學名。
碧漢遙憐通閣道，弱流元不隔蓬瀛。
尚餘忠赤供趨向，豈有文章佐聖明。
幸傍紫垣占象緯，泰階平處玉為衡。

次韻荅霍渭厓

西望遙山紫翠鋪，蓬壺瓊島切清都。
仙才何用東求海，王會仍須繪作圖。
金榜日高懸五鳳，玉河水滿浴雙鳬。
遭逢若論恩波闊，憶向瀟湘萬頃湖。

送鄒東郭學士赴南院

手綰銅章白玉堂
天南星斗避文光
清華官府真仙界
佳麗江山舊帝鄉
擲地賦聲添紙價
傳心書法長秋陽
河堤待築還朝路
雙闕天連一水長

南還途中有作

是日長至

兩日出城重作客
一年長至馬蹄中
履霜夜展東陵祀
到海山迴萬里風
平望歲華搖御柳
南來王氣滿珠宮
何人寒谷能吹律
正見祥雲映日紅

潞河候水次張石川韻

心同野鶴恣高飛學得屠龍與願違
魂夢九天雙鳳闕江湖滿地一漁磯
安身已辦烏皮几稱體新裁白苧衣
賴有河邊同載客不應林下見猶稀

和荅陶南川兵侍

片雲將雨過西山望斷東歸水上灣
海近似聞龍卧起天高不礙鶴飛還
桓公老去琅玕樹白傅歸來洛社間
更遣餘工擬叢桂案頭湘管紫琳斑

青羊宮餞顧頤齋即事

青羊翠栢白雲阿，又是春風一度過。
宿霧欲收初露見，餘寒猶在薄侵羅。
行邊巷陌流塵遠，物外樓臺勝事多。
無數鄉山心水隔，酒闌重與聽驪歌。

壽顧東川表弟

春明榮戟錦衣鮮，近捧丹符下九天。
標柱舊題酌駟馬，繡筵新啓集羣仙。
如白玉臨風樹袖，有黃庭煉石篇。
無限韶光正明媚，杖藜携酒過東川。

廖學士鳴吾孫園之招席上和曾都諫日宣一首

偶借春風半日間來尋綠野共開顏
蒼松翠竹含新雨金殿朱旗對遠山
勝事已傳豐沛裏高情多在水雲間
玉堂青鎖俱仙侶文雅風騷莫放慳

和姚尚美龍山會詩

金錢片片籬邊疊買得天家一段秋
橙橘飽霜黃樹頂芙蓉印水茜江漚
縱數陣飛歸鴈款乃一聲歌牧牛

人世都來能幾日牀頭詩債會須酬

老母自八月末失調至于十二月逾一時六日
始離牀褥扶杖引步負暄弄孫于簷下若春木
向榮朝暾屏翳前十月廿八日為誕辰湯藥之
中惟焚香告天不得備禮是日乃取卮酒拜獻
團圞相保得遂母子姑婦之歡因志以詩

蕭蕭雪鬢病餘深半倚蓬籠尚擁衾教子揮金酌國手
抱孫低語調鄉音恐驚舊日迴明鏡喜是今朝捧御簪

重覓斑衣補春酒長箋題遍鶴飛吟

五言絕句

四十
七首

十二日試燈

三五近春宵長空萬里遙
預期華月滿先借綵燈燒

漫興二首

兩兩鳥對語翩翩燕又來
草堂渾似昔時有好花開

二

簾紋青窳地橋影碧涵波
江館騰騰路漁郎款款歌

初夏八首

雨打蝸牛篆水回
科斗文辛夷花正發
咄咄欲書雲

二

竹粉輕過院
秧針短出潮
瘦筇妨草耳
高屐距山腰

三

行蟻醒槐夢
游蜂靜蜜衙
嫣然成一笑
更愛雨中花

四

散步常依樹
高眠且枕流
北牕陶令宅
南國庾公樓

五

雨意初蒸暑林聲已變禽魚旬斷來往無日罷登臨

六

竹閣開林樾蘭舟過石塘歲年占五穀風物近端陽

七

雨歇鳩鳴午風行麥送秋村村雞犬裏疑有故時候

八

晚潮常帶月夏雨不過田身世江湖裏人家水木邊

敬亭

竹色寒不改綠陰常到門年年春雨裏箇箇長龍孫

思亭

杉檜鬱參天山深含紫烟秋高霜露裏落葉滿亭前

醉窩

愛酒不愛醉酒深如有神同來送日月無奈獨醒人

觀水碓

圓機蒼高杓急水激飛輪桔槔已多事愁殺灌園人

西巖詩

有序

西山在今都城之坤隅是中多巖岫洞壑之
勝都閭劉君世臣燕產也嘗遊其地愛焉即
以西巖自號雖宦輒四馳人稱之必曰西巖
云西巖本出揚州之族與予俱為南人同事
西蜀有鄉邦之好為作西巖好七章贈之隨
地可歌不必在金臺之右易水之左也

我愛西巖好桑榆一徑長歲寒奇節操搖落任風霜

二

我愛西巖好風光足大觀微波分太液咫尺是長安

三

我愛西巖好三台接九天何時飛閣裏東海看桑田

四

我愛西巖好巖中動八荒五丁翻地軸一矢射天狼

五

我愛西巖好居延出酒泉星流白羽箭風吼紫金鞭

六

我愛西巖好川西與浙西林逋湖上興杜甫峽中題

七

我愛西巖好他鄉說故鄉揚州迴鶴背燕國射龍光

辛丑歸途中絕句五首

忽憶乘高躅因知遡急流陶潛初罷令李廣不封侯

二

野曠餘長畝家嚴具敵樓舊巢飛燕于古壁篆蝸牛

三

柳徑縈隄曲柴門逐水開無心論出處有客賦歸來

四

四十年前路三千里外心人生幾兩屐閒處萬黃金

五

畏影常依樹尋盟每問鷗天邊孤竹國雲裏仲宣樓

過宋玉墓

楚國餘文藻當春過故邱為君悲不已安敢向高秋

和蒲汀顯陵道中柳陰小憩四首

花霧濛濛遠山雲冉冉高車陪金紫客時觀赭黃袍

二

寢殿祥雲合山陵王氣高風光饒帝里春色滿恩袍

三

路細青山轉天空白日高同來三扈從碧柳蔭朱袍

四

天子岡頭路風雲北斗高穿林迴雉扇度嶺耀龍袍

和安鴻漸登樓曲

團圓三五夜待月上高樓誰知風共雨又妬一年秋

方春野挽詞三首

春野依然在春風依舊來去年巢裏燕不見主人回

二

楊子談玄宅陶潛漉酒巾一時俱寂寞愁絕不堪論

三

樹遠滕王閣溪流徐孺祠昔年遊賞處花落雨絲絲

書扇寄李百朋

錦浪生春水茅亭盡日孤十年身不病天遠共江湖

詠石七首

呂公

中峯有二
竅如呂字

呂公本俠士詭稱回道入黃金亦可變誰云非法身

蓑衣真人

石紋縷縷下
垂若蓑衣

真人已忘我猶著雨蓑衣一朝盡劫盡風雪不知歸

麻衣道者

度長人立
皺若裂縑

當年錢若水寒夜撥爐灰若是公侯骨定應期不來

邁邇仙

形骨昌侈
不受束縛

古來神仙侶均為柱石材得志有廊廟有時居草萊

劍石

背呂公而
聳透石劍

葛陂化為龍八公亦鍊石偕身遠報讐凝血今成碧

紫雲

積翠競萬壑孤頑自離羣因風欲吹墮夕陽明夏雲

紫芝峯

采芝堪療饑煮石亦可餐
悵望商山老浩歌蜀道難

題江海看雲卷三首


南有一片雲因風墮東海
彌天作霖雨望之若可采

二

海上會看雲飄飄迥不羣
扶桑紅日近錦繡總成紋

三

我愛看雲客江行復渡江
東風一夜雨夢遶紫荊牕



嚴山續集卷六

欽定四庫全書

集部

儼山續集卷

七八

詳校官庶吉士_臣李如筠

中書_臣劉源溥覆勘

總校官中允銜_臣王燕緒

校對官助教_臣汪錫魁

謄錄監生_臣李 崑

欽定四庫全書

儼山續集卷七

明 陸深 撰

七言絕句

七十首

春日送客即事

春陰漠漠晝沉沉
度嶺穿林深復深
闌路望窮人正去
野花開處鳥能吟

漫興

水郭江村不受塵
惟將石竹伴閒身
玲瓏漏月看雲骨
瀟灑含風對玉人

登樓

掉臂歸來萬里身
倚闌無數物華新
細尋往事知多少
我是明年五十人

雨窓春興

泉石烟霞共此身
總於春雨長精神
窓前更有芭蕉樹
一夜輸心似向人

溪山疊疊雪初寒
江水悠悠一釣竿
着得羊裘竟何益
蓑衣和月下前灘

晚放舟東渡

扁舟搖蕩浦雲東
疑有神仙向碧空
製得六銖衣試着
新涼浮動一襟風

題陸封君怡梅卷

我家放鶴坡頭樹
種近西湖處士居
獨板橋邊山十里
杖藜來探雪晴初

吳江長橋奉和遂庵閣老

長年此地往來過風景時時付短歌
千尺卧龍如未起水光山色柰愁何

買得一小舟往來江上題曰水晶宮

三江西下五湖東風月烟波四望中
我買一舟輕似葉分明搖動水晶宮

架石

標排甲乙位高低愛殺山翁手自題
多少黃金教歌舞

落紅空濺雨中泥

客至小酌花下

客到東軒慰病身
嫩涼天氣露華新
人生有酒花前飲
酒色花枝俱照人

春日雜興

惜春無計為春留
獨倚元龍水上樓
無數飛花隨宿雨
海門東去更東流

題屈處誠雪竹

蕭蕭雲物滿堂寒
屈老風神向筆端
帶雪琅玕三百箇
將家徑裏見袁安

為方思道題畫眉折枝

中山紫翠護層層
合起高樓對雨凭
愛汝一雙花底鳥
為春啼殺海棠陵

張仙斜

驂鸞歸去是何年
覆釜山頭有墓田
名姓却隨丹竈在
縣人相對說張顛

重陽後六日登鏡光閣五首

層層樓閣俯京畿一帶清溪白鳥飛
直北長城千萬堞江山如此美人稀

天涯秋色倍思家南鴈歸來萬里沙
今是重陽第幾日登高無處問黃花

曲闌矮几坐晴波柿子胡桃落葉多
為愛城西好風景相期一日一來過

並馬來尋水西寺春風憶我慣曾遊
壁間題字悲歡共

金谷園
簾下爐烟盡日浮

城外光陰日易斜
城中車馬足風沙
此時極目登臨意
舊有雲山幾片遮

送楊百川赴南太常典簿

南國容臺我舊遊
淡花疎竹映高秋
送君秋日容臺去
無限鄉心逐水流

寄龔錦子

春風三月滿汀洲
來看瓊花憶壯遊
二十年前文墨社

思君不見過楊州

任城題楊閤直夫泉香書屋二首

水紋花氣鬪精神疑是成都賣卜人
傳得一區楊子宅藥苗閒洗雨中春

常山人家畫不如君家宛在畫中居
草堂新開何所有半貯參苓半貯書

崇法寺刻竹

養花天氣帶微寒林下輕烟製月團
忽過僧寮題竹坐

春釀如酒對琅玕

馬嵬

秦關山勢拂雲來才過驪山又馬嵬今日豈知當日事
澗花含笑為誰開

予素不能飲酒昨至成都僚友並勸予蜀燒酒
云可祛暑濕也命家童以蜜和之初吸半醺漸
至引滿復能加一酌極有効自後每晨起便飲
飲之輒冲和與年少時苦酒迥異不意老來始

知其趣乃爾日飲兩三度陶如也家童驚喜謂
自飲酒來顏色頗異豈於此將有所得耶笑成

一絕

向來酒醖太無緣多負風花雪月天今日天公憐老大
放懷加量到西川

都司紅蕉為逸騎所傷

粉牆高映綠成陰待看紅花雪裏深一任摧殘付蹄啣
人間何限惜花心

桂州夜宴出青州山查薦名

南珍盧橘與枇杷北果紅秋帶晚霞清潤入脾消酒渴
斃甌如雪更宜茶

張西峯少叅以詩促歷次韻答之二首

幾時不見張公乎風調才情正可人頗怪歲寒催短景
為君遲送一年春

祇辦送迎酬過客那知城市有閒人何須鳳歷看時令
才有花開便是春

病起獨坐東堂

病後光陰迥不同，怯寒嗔熱怕當風。
不知短髮緣何事，盡點霜華入鏡中。

來青軒和玉溪韻

磴轉峯迴年復年，古藤喬木暗流泉。
西天正在西牕外，一片青青落照前。

送人往姑蘇

春病春愁撥不開，欲因東海望蓬萊。
扁舟不得從君去，

同上姑蘇百尺臺

嵇忠穆墓

滿川花柳鬪春分
城日初高艷綺雲
恩怨一空人代換
道旁猶表侍中墳

曉過鹹寨

僻間黯黯路漫漫
茅舍雞聲夜向闌
浮世無端渾似夢
春來客夢更無端

題西域圖

自從博望通西域唐代諸豪最盛強今日玉門關外路
不須請組繫名王

自劉元海嘯起中原馴致契丹金元之盛防微
杜漸令人三歎息於徙戎一論也西北諸邊回
族尤黠鷙猛嗜慾出於其性此圖簡遠頗得其
情狀於丹青之外蓋錦衣沈君所藏展開之餘
不能無感於近事因書一絕其後云

題竹送王秉哲

平安不用報泥金
春雨龍孫看過林
贏得清風滿人耳
汗青留秘玉堂深

題雙嶼

水面波心相對開
海門西望妙高臺
不須更問蓬瀛路
獨棹扁舟自往來

題畫鷹

素練秋高草樹枯
來從東海勢應孤
即看一擊還千里
更愛凌風不受呼

雪後次西峯韻二首

長安旭日照西峯
照見峯頭千尺松
龍甲虬枝風鬣動
蒼顏翠色露華濃

獨上高樓望雪峯
有人卧雪伴長松
不知門外停車蓋
鐵被皴稜睡正濃

題倪雲林畫壽齋詩轉壽唐龍江

倪郎逸筆壽齋詩
轉壽龍江海鶴姿
如此山林歲寒節
便拚千丈鬢成絲

題黃斗塘詩畫

飛鴻雪跡為誰留
筆底青松走翠虬
憶得縣衙公事散
聽風聽雨水西頭

送顧生文美遊瑞安

碧峯黃葉釀高秋
滿架圖書手校讐
見說遠遊南海去
好隨龍氣望瀛洲

題馮會東雪竹卷

強項折腰還一時
要看雪裏兩三枝
春風桃李花無數

白白紅紅吹又吹

寄南莊

相看無限故園情
獨寄西樓向晚晴
秋水一奩天上下
荻花楓葉隔江城

贈董子元

汝家舊業天人策
漢室公卿第一流
猶有箕裘待華胄
杏花春雨曲江頭

題畫萱

樹背殷勤祝歲華
短鋤將雨護春沙
朝來省識丹青意
留取堂中日日花

題畫寄陶良伯

東谷先生谷水東
黑頭歸去五雲中
門前五柳今如許
不負陶家有祖風

題悅茶卷

水竹交居事事宜
更將春思鬪槍旗
分符調得中泠到
未放松陰鶴夢遲

予與龔錦子別凡十年矣丙戌冬初再得書不
勝馳想題此寄之

人間真有楊州鶴海上寧無青鳥書一紙應須萬金價
相思又是十年餘

題馬麟畫蘭

秋風九畹正離離畫裏相看一兩枝欲寄所思無奈遠
閒拈湘管對題詩

梅雪絕句三首

嶺南多梅却少雪塞北苦寒花絕無爭似吳峯千尺白
暗香疎影兩三株

主人亭子青山曲雪護梅花傍綺疏扶起隔宵淹酒病
裹頭袖手仗消除

淺沙細水獨相親無賴飛瓊妬早春本是玉肌偏耐冷
捲簾狐負惜花人

挽人失偶

春辭原上花銷雨鷺去臺空鳳獨飛寒夜燈前開故篋

不知淚滿舊縫衣

題竹隱卷

拋却閒緣謝畏途
短床方簟竹間鋪
睡餘滿地西風後
亂掃枯枝下酒壚

過無錫

泉聲高下青山裏
樹影蕭疎廢堞前
無數客愁驅不盡
買魚沽酒喚開船

人持元史至用二十陌得之

囊中恰減三旬用
架上新添一束書
但使典墳常在手
未嫌茅舍食無魚

壽陽察院次壁間韻二首

無心隨處夢魂安
古栢臺深五月寒
自笑青山老居士
松牕閒殺舊蒲團

疎慵聊與拙相安
華髮蕭蕭鏡裏寒
門掩萬山深院靜
古槐成蓋綠陰團

試院初寒偶閱陶詩

三日無詩太好奇

致翁事

莫將胸次惱希夷不知彭澤緣

何事十七年來九首詩

寄姚文光

白鶴江頭白鶴村水芳沙暖有名園谿南九月黃花信
欲覓餐英夜過門

鄉人送菊列之堂中

滿堂秋色又年華白白紅紅客到家不似東籬老陶令
只愁無酒對黃花

前十年願豐堂曾識金宗魯後十年宗魯之子
復至江山如昨而余已老矣不知今吾故吾寧
何如耶漫興一首

曾看老馬五花紋驥子風神又出羣世上驪黃總相似
不知誰為掃千軍

過溪莊留題

漠漠平田水漫流溪莊端合雨中遊主人愛客千金壽
報爾天香萬斛秋

謝何登之惠玉蘭

揚州何遜最能文
江水東流隔暮雲
我有好峯三十六
玉蘭花發正思君

儼山續集卷七